


PAGHINUMDUM SA GINOO

 Salamat, Igsoong Neville. Malipayon kaayo ko nga maania dinhi, Igsoong Neville, ug sa—sa kahigayonan nga makalingkod pag-usab sa niining Langitnong mga dapit, diha kang Cristo Jesus. Ug dili gyud problema sa ako ang gidaghanon sa mga mananambong, nagapadasig hinoon kini kanako sa kanunay. Kabalo mo, mas...mas mabati ko nga anaa lang ako sa amoa pag diyutay ra ang gidaghanon, tungod kay sa hunahuna ko ingon niana man ang Iglesia. Oo, aduna ko'y Kasulatan para niana, nga nagaingon, "Ayaw'g kahadlok, diyutay'ng Panon, sa maayong kabubut-on kini sa inyong—inyong Amahan nga igahatag kaninyo ang Gingharian." Ug akong...kana mao ang diyutay'ng Panon nga ginatinguha kong mahiapil nianang adlaw, nga gisultihan Niya nga, "Ayaw'g kahadlok." Ug malipayon kaayo kita tungod sa pribilhiyong makatambong dinhi karong gabhiona.

² Ug wala ako mianhi nga may tinguha nga mamulong. Kaganina lang adunay tawo nga miduol sa pultahan, ug samtang nga nagatuon ako, nagapangandam og pipila ka konteksto para sa pipila ka teksto nga gusto kong gamiton sa umaabot nga mga panagtigum didto sa Phoenix ug Tucson, ug sa palibot nga dapit didto. Ug nagakabusog gyud ako sa Espiritu, kabalo mo, og sa mga maayong butang nga iya sa Dios, mahitungod sa usa ka Pinakabasihanan, ug usa ka hilisgotanan mahitungod sa *Pinakabasihanan*. Ug miduol ang akong asawa ug giingnan ko niya nga aduna kono'y tawong miabot para makigkita sa ako, ug ako—medyo wala ko man kadto nasabtan, mao nga pagkahuman, bueno, miingon, "Moadto ba ka sa simbahan unyang gabii?"

³ Ug miingon ko, "Basin makaadto ko." Ug nagpadayon na ko sa pagpaningkamot nga makapabilin sa espiritu bahin sa akong ginabuhat. Ug mibalik siya ug miingon nga usa kono ka masakiton nga tawo ang miabot para maiampo. Ingon ko, "Bueno, kung ingon-ana, moadto na lang ko sa simbahan, bisan pa man, kita mo, kung kinahanglan nga mag-ampo para sa may sakit." Kanunay kong, sa ingon-ana...Kabalo mo, pag mga ingon-ana...kinahanglan natong maatiman sila sa ingon ka dali pag nagmasakiton ang mga tawo ug nagkinahanglan. Ang si kinsa man nga nagmasakiton nasayod gayud kung unsa ang ilang pagpasalamat ingon nga naayo tungod sa dakung gahum sa Dios nga nagapang-ayo. Ug pagkaanindot gayud nga butang kini, pagkaanindot nga pribilhiyo.

⁴ Bueno, sa sunod nga Domingo, kung itugot sa Ginoo, kon wala ma'y espesyal nga giandam sila ni Igsoong Neville, nahunahuna ko nga sa sunod Domingo sa buntag akong—akong ihatud ang akong pang-Pasko nga mensahe sa mga tawo, tungod

silatungod sila . . . Ang uban kanila gikan pa baya sa halayo, kabalo na mo, sama sa Georgia ug nagkalainlaing mga lugar, ug para magahinan sila og panahon nga makapanguli para buhaton ang ilang pagpamalit para sa Pasko ug uban pa.

⁵ Ug bag-o lang migawas si Billy ug gisultihan ako, ang ingon nga ang akong igsoon kono, si Delores, sa sunod Dominggo sa gabii sa dili pa ang panerbisyo, aduna kono siya’y mora’g diyutay’ng—diyutay’ng regalo para sa mga bata, usa ka hamubong programa dinhi nga ilang, kabalo na mo, usa ka hamubong pang-Pasko nga drama nga gusto nilang buhaton sa dili pa magsugod ang mga buluhaton. Ug ingon ko, “Bueno, dili ba sa Dominggo sa gabii man kana?”

Miingon, “Oo.”

Ingon ko, “Hinoon dili man kana makadisturbo, kung ingon-ana.”

⁶ Bueno, kita n’yo, sa sunod Martes bisperas na sa Pasko, dayon kung . . . o sunod Martes diy, usa pa ka semana, Pasko na. Mao nga basin maapikihan na ang mga tawo, nakita n’yo, nga kinahanglan pang manguli sa bisperas sa Pasko, pagka Lunes, busa nahunahuna ko nga akong . . . oo, duha ka semana. Husto kana, husto ra ang duha ka semana. Mao nga nahunahuna ko nga angay’ng makaanhi gyud ako karong gabhiona ug pahibaloon ang mga tawo, kung itugot sa Ginoo, ug kon wala ma’y espesyal nga giandam si Igsoong Neville. Tungod, kasagaran gusto man gud nako nga maghatag sa akong pang-Pasko nga mensahe sa iglesia, ug sa akong mensahe sa Pasko sa Pagkabanhaw, ug kung unsa man ang ipahimutang sa Ginoo sa akong kasingkasing para ihatag. Ug sa sunod Dominggo, kon itugot sa Ginoo, sa sunod Dominggo sa buntag igahatag ko . . .

⁷ Ug ang hinungdan nga buntag ko kini buhaton inay nga gabii, tungod aron ang mga tawo nga gikan pa sa halayo, aduna pa sila’y hapon para makabiyaha og aron makapanguli sila, nakita n’yo. Ug mas gusto ko unta nga sa gabii kini ipahigayon, sa hunahuna ko mas maayo gyud pag gabii. Ako—gusto ko man gud og pang-gabii nga panerbisyo, pag misalop na ang adlaw, mora’g, ingon niana. Ang Dios kaniadto sa tanaman sa Eden, ngadto kang Adan, nagaabot man sa kabugnaw sa kagabhion ug nagapakigsulti kang Adan. Kita n’yo, ug mao nga ganahan ko og pang-gabii nga panerbisyo. Pero, tungod sa mga kahimtang dinhi, mas maayo nga ipahigayon ko kini sa buntag, ug aron makapanguli dayon ang mga tawo.

⁸ Ug mapasalamaton ako nga gipadak-an ang tabernakulo dinhi hangtud sa pikas bahin sa gawas nato dinhi, og duna na’y mas daku nga lugar dinhi. Human ang pagpanghisgotanay ug panaglantugiy, sa kaulahian nakuha ra gyud nato kini bisan pa man. Kabalo mo, ang tigulang nga si Igsoong Bosworth kaniadto aduna ma’y abilidad magpakatawa, miingon, “Ang

bata kono nga pinakakusog mohilak mao ang pinakamakadani og pagtagad.” Busa ingon niana gayud kana, kabalo na mo, ug mao nga sa hunahuna ko mapuslanon gyud nga mohilak pud kita diyutay usahay, dili ba?

⁹ Bueno, ug buot kong dayegon si Igsoong Anthony ug ang iyang mga kaubanan dinhi tungod niadtong maanindot nga musika. Sa pagsulod ko nadungog ko dayon kadto. Ug, kabalo mo, ang ilang mga instrumento maoy mga trumpeta. Gusto gyud unta nako nga ang usa sa akong mga anak, bisan usa lang kanila, ang makatugtog og trumpeta, ako—ako . . . ug kanang mga ginahuyop nga instrumento.

¹⁰ Nagsugod na unta si Becky sa piyano, pero tungod nga siya’y anaa na sa pangidaron sa pagkatin-edyer, kabalo na mo, ingon niana, gusto na niyang moundang dayon. Ug—ug nagsugod na siya . . . Miingon ang magtutudlo nga kinahanglan kono nilang magsugod sa popular nga musika. Dili, nga, dili ko ginapasabot . . . kabalo na mo sa buot kong ipasabot, mga pasiuna nga musika, ug uban pa, nga klasikal nga musika, aron mapaingon sa pang-relihiyon nga musika. Sa dihang nakakuha na siya og hataas nga grado niana, dayon naghunahuna siya, “Siguro, moundang na ko.” Ug ako—ako . . . problema gyud ang mga kabataan. Ug, bisan pa man, kinahanglan man gud nga usa kana ka pagtawag sa Dios, sa sugod pa lang. Pero sa tan-aw ko ang iyang igsoong, si Sarah, nga anaa dinha sa luyo mora’g malabwan pa siya, siguro, ug wala pa lang siya natudloan. Busa, bueno mas maayo gyud ang pagtawag sa Dios kon gigasa kini nga ingon niana.

¹¹ Pero ganahan gyud ko og trumpeta. Nadumduman ko pa niadtong gididikar nila kining tabernakulo dinha sa may kanto, gipatingog ang mga trumpeta sulod sa tunga sa adlaw dinhi, “Down at the cross where my Saviour died, down there for pardon from sin I cried, there to my heart was the Blood applied,” niadtong gipahimutang ko ang akong konteksto diha sa ulohang-bato.

¹² Ug nadumduman nako usa niadto ka gabii sa simbahan sa Trinity Methodist, kaniadtong ang tigulang nga si Doktor Morrison . . . Daghan sa inyo nga nagkinabuhi na sa mga adlaw ko kaniadto ang nakahinum dum kang Doktor Morrison, usa ka tigulang nga balaang lalaki. Nawad-an gyud ang Asbury og usa sa mga halangdong lalaki sukad niadto kang Asbury, sa dihang nawala sa ilaha si Doktor Morrison, tungod sa iyang katigulangon, usa ka diosnong tigulang nga lalaki. Ug sa una pa gusto na gyud nakong madungog siya nga nagawali. Ug mao nga miadto ako para madungog siya didto sa simbhang Trinity Methodist. Ug niadtong gabhiona, may duha ka batan-ong lalaki nga migawas sa gamay’ng balkonahe samtang nagalakaw kami sa akong asawa, ug ginabayaw nila ang ilang mga trumpeta nga nakaingon niana, ug kadto nga mga instrumento didto,

ug gitugtog nila ang, “Down at the cross where my Saviour died!” May dakung krus didto sa ibabaw, ang nagatuyok-tuyok. Nagtindog lang ko sa dalan ug gipataas ang akong mga kamot, og misugod sa pagdayeg sa Dios didto mismo. Dili gyud nako mapunggan.

¹³ May sa kung unsa nga matang sa emosyon sa kinasuloran sa usa ka natawo na pag-usab nga Cristohanon, sa dihang mopitik Kini, siguradong aduna gyu’y mahitabo, ingon-ana gayud. Oh, ako. . . Wala gayu’y unsa man nga sama sa usa ka kinaraan nga Cristohanon. Tinuod kana. Dili ako modawat og unsa man nga puli niini, ang akong kasinatian, dili ko gyud kini ibaylo sa unsa man nga mga bahandi sa kalibutan, o sa tibuok kalibutan, ni sa tibuok solar system ug tanan na, sa kung unsay gitudlo kanako ni Jesus mahitungod sa Iyang Kaugalingon.

¹⁴ May usa ka lalaki nga ania uban kanato, nga kada motan-aw ko sa luyo nagalukso ang akong kasingkasing. Usa kini ka lalaki nga nakita ko nga midawat og komunyon, niadtong miaging gabii, nagalakaw siya nga naka-sungkod. Duna na ba’y nakasulti sa imoha nga kanawong nimo si Oral Roberts? [Nagaingon ang igsoong lalaki, “Bueno, igsoon, ikaw pa lang ang nakasulti, sa pagsulod ko dinhi karon. Nagahulat ra ko nga mamatikdan mo kana.”—Ed.] Sultihan ko kamo, sa matag higayon nga akong. . . Pila man. . . Nakakita na man mo kang Oral Roberts, halos kamong tanan. Ambot kung dili ba gyud niya kanawong si Oral Roberts! Nahitabo lang nga mitan-aw ko sa luyo. Ug ako—sa tan-aw ko medyo mas dakuon lang siya nga tawo kaysa kang Oral. Pero kon tan-awon mismo ang pagkasudlay niya sa iyang buhok, ug ang iyang agtang ug ang iyang hitsura, ug sa kanunay mora pud og dungganon nga tawo, og nagalingkod nga daw si Oral. Ug mao nga ako—mahunahuna ko pirmi, “Igsoong Oral?” Kanawong man gud kaayo niya.

¹⁵ Si Igsoong Oral diay duna siya’y ginasugdan nga usa ka matang sa eskwelahan pang-Biblia didto karon, sa hunahuna ko, o mora’g ingon-ana. Nadungog ko ang mahitungod niini niadtong miaging adlaw. Unsa gani kadto? [Nagaingon si Igsoong Neville, “Unibersidad.”—Ed.] Unibersidad. Oo. Si Igsoong Carl Williams ang usa sa mga basihanon niya niini, mora’g ingon niana, wala lang ko kabalo kung unsa gyud.

¹⁶ Bueno, karon hinumdumi n’yo, sa Domingo, kon itugot sa Ginoo, sugdan nato, aduna man ko’y mensahe sa Pasko sa Pagkabanhaw. . . o sa Pasko. Ug usab mapasalamaton gyud ako—ako nga nasugdan na ang tabernakulo. Ug mao nga nagalaum ako nga dili lang kini ingon nga pangdugang sa gidaghanon, kondili mamahimo kining dugang sa grasya nga igahatag sa Dios sa atong iglesia, sa atong kalihokan, sa atong. . . dili kalihokan, kondili sa atong kongregasyon diin kita nagakatigum. Gusto gyud nato kini.

¹⁷ Ug—ug buot ko lang isulti kini. Dili ako mogahin og dakung oras. Pero, daghang mga butang nga angay ko untang isulti, pero dili nako mahimo, tungod mogahin man gud og dakung oras. Pero, buot kong isulti, nga usa kini ka butang nga dili ko puedeng isulti. Aduna man gu’y mga butang (nasabtan man sa tanan) nga nahibaloan mo, ug kini’y sa Ngalan sa Ginoo, pero bisan pa niana dili mo kini puedeng isulti. Nakita n’yo, kinahanglan nga ikaw lang nahibalo niini. Kita n’yo? Apan may usa ka panghitabo nga umalabot na, ug dugay-dugay nang, andam nga mahitabo, nga naalarma gyud ako sa pagkakita sa Balaang Espiritu nga nagalihok sa taliwala sa mga tawo hangtud niana nga punto, pero wala man lang sila’y nahibaloan ni usa ka yutan-ong butang, kita n’yo, pero nakita ko ang Balaang Espiritu nga nagalihok paingon niana. Ibutyag ko ra kini, kon itugot sa Ginoo, sa usa ka gitakda nga panahon. Karon, timan-i n’yo, nagapakita kana nga anaa mismo ang Dios sa taliwala nila.

¹⁸ Maingon sa gisulti sa usa ka tawo, sa hunahuna ko, usa ka igsoon, oo, kaganina, miingon si Igsoong Neville nga, “Ang Dios, wala ginaisip ang atong—atong mga kalamukat sa taliwala nato, ang atong wala-pagminatarung sa Iyang atubangan.” Nga ang magtatan-aw kaniadto nga miadto aron sud-ongon ang Israel, ug nakita niya kadto sa natural nga mata, ug kung unsa kadto ka kalamukat, ingon nga nakabuhat sila og sayup ug angay gyud silang tunglohon. Pero ang wala makita sa obispo mao kadtong gibunalan nga Bato ug kadtong Tumbaga nga Serpente, kita n’yo, nga nagabayad-sa-sala. Busa, nakita n’yo, sa dihang—sa dihang mitan-aw si Balaam sa Israel, nakakita siya og hinungdan para tunglohon sila. Kita n’yo? Apan sa dihang mitan-aw ang Dios kanila, nakita Niya mismo ang pangbayad-sa-sala. Miingon Siya, “Sama ikaw sa usa ka bakang ihalas.” Amen. “Kinsa man ang magbutang og unsa mang babag sa imong dalan? Daw sa unsa ka diosnon, daw sa unsa ka matarung ang imong mga balongbalong!” Ingon niana ang pagtan-aw sa Dios sa ilaha. Kita n’yo? Dili sa kung unsa ang pagtan-aw sa tawo sa ilaha, dili sa kung unsa ang pagtan-aw sa ilaha sa—sa mga may hataas-og-katungdanan; kondili kung unsa mismo ang pagtan-aw sa Dios kanila.

¹⁹ Ug, Oh Dios, itugot nga ingon niana unta ang mamahimo kong bahin! Itugot nga ingon niana unta ang mamahimo kong bahin, tungod wala gyud ko’y bisan unsa man sa akong kaugalingon nga mahimo kong angkonon. “Wala gayud ako’y madala, sa Imong krus lamang ako nagahawid.” Kita n’yo, kana lang ang aduna kita.

²⁰ Bueno, ingon nga gabii kini para sa panagtigum sa pag-ampo, o dili diay gabii para sa panagtigum sa pag-ampo, kondili mora kini og usa ka pang-ebanghelyo nga grupo dinhi. Gusto nato—natong ipahimutang ang Pulong. Ug tingali’g mamulong ako sa inyo karong gabhiona sulod sa pipila ka gutlo. Daghan

kaninyo nga gustong moabli sa Kasulatan. . . Bueno, abi ninyo, pagkatalagsaon gayud, nga naablihan ko kini mismo, sa teksto nga akong pagabasahon. Oo, sir. Makahibulong. Kana'y sa Unang Mga Taga-Corinto, sa ika-11 nga kapitulo, ug may pipila ka sinulat nga akong gisulat dinhi, sa kon asa man dinhi, nga akong gihunahuna, kung makita ko ba kini karon, sa Unang Mga Taga-Corinto, sa—sa—sa ika-11 nga kapitulo. Ania gayud, dinhi mismo. Oo, sir.

²¹ Karon, sa dili pa kita moduol sa Pulong, moduol sá kita sa Tagsulat, kita n'yo, Nga mao ang Pulong, aron mangamuyo kita alang sa kalooy ug sa Iyang mga panalangin samtang nagatuon kita Kaniya Nga mao ang Pulong. Mag-ampo kita.

²² Oh Ginoong Dios, nga puno sa grasya ug kalooy, Nga nagtinguha gayud sa tanang mga nangaging kapanahonan, human nga nakasala ang tawo ug nagpahimutang nianang halapad nga bung-aw tali kaniya ug Kanimo, usa ka bung-aw nga dili niya malabang pabalik sa iyahang kaugalingon. Walay pagduhaduha nga ang tawo, bug-os gayud nga nalaglag, og wala na'y paagi aron makabalik. Apan ang Dios sa. . . puno sa bug-os nga grasya, andam gayud nga modawat og usa ka Pangpuli sa lugar sa tawo, ug aron mapahibalik siya. Kana ang nakapalipay sa mga kasingkasing sa tanan nga nakaila Kanimo, Ginoo, kung unsa nga tungod sa Imong dakung gugma ug grasya midawat Ka og usa ka Pangpuli! Ug ingon nga bag-o lang namong gipahayag kini, Ginoo, sa niana nga Pangpuli kami nagasalig karong gabhiona, kanang Usa Nga namatay imbis nga kami unta nga mga makasasala, ang Maong matarung Nga Mao'y nag-angkon sa among pagkadili-matarung. Diha Kaniya kami nagasalig.

²³ Karon maalampoon kami nga nagaduol sa Iyang Pulong, nga nakayukbo ang mga kasingkasing ug mga ulo, nga may pagtahud ug sa pagtahud ug sa pagpasalamat. Ug nagapangamuyo kami nga ipadala Mo kanamo karong gabhiona, ang grasya, pinaagi sa Balaang Espiritu, ug ihatag kanamo ang—ang Tinapay sa Kinabuhi nga gikinahanglan namo aron makalahutay kami. Hingsayran Mo gayud ang among gikinahanglan, ug nasayod kami nga nagsaad Ikaw nga kung mangayo kami nan magadawat kami.

²⁴ Hinumduman pud namo karong gabhiona, Ginoo, ang tanan nga nahibaloan namo nga mga may sakit ug mga nanginahanglan, nga maihatag kanila ang grasya sa Dios sa kadagaya. Ug, Amahan, ginaampo namo kadtong mga nangtipas, nga kining umaabot nga bakasyon magpahinumdom unta sa ilang kasingkasing, kon asa sila kaniadto, ug unya nahulog sila pagawas sa pagpakig-fellowship Kanimo. Dios, ginaampo namo nga mamalik na unta sila (itugot kini, Ginoo), mamalik sa kongregasyon, sa—sa Kongregasyon sa Kamagulangan, mamalik sa kon diin adunay grasya ug kalooy,

ug gugma ug pagkamaayo, ug kaayohan sa among mga kalag, sa among mga hunahuna ug sa among mga lawas. Itugot kini, Ginoo. Panalangini sàb ang Pulong karong gabhiona. Lig-ona kaming tanan, ug ihatag kanamo ang Imong mga panalangin, tungod nga amo kining ginapangamuyo sa Ngalan ni Jesus. Amen.

²⁵ Karon, sa makadiyut lamang gusto kong awhagon ang inyong pagtagad ngadto sa Unang Mga Taga-Corinto, sa ika-11 nga kapitulo, ika-23, ika-24, ug ika-25 nga bersekulo.

Kay gidawat ko gikan sa Ginoo ang gihatag ko usab kaninyo, Nga ang Ginoong Jesus sa gabii sa pagbudhi kaniya mikuha og tinapay:

Ug sa nakapasalamat na siya, kini iyang gipikaspikas, ug miingon, Kumuha kamo, ug kumaon kamo: kini mao ang akong lawas, nga gipikaspikas alang kaninyo: buhata ninyo kini sa paghandum kanako.

Sa mao usab nga paagi ang copa gikuha niya, sa human ang panihapon, nga miingon: Kini nga copa mao ang bag-o nga tugon sa akong dugo: buhata ninyo kini, sa matag inom ninyo niini, sa paghandum kanako.

²⁶ Kung pagaulohan ko kining hamubong teksto nga gusto kong pahinungdan, kini'y ingon niini: *Paghinumdum Sa Ginoo*. Daw sa usa kini ka gabii nga . . . o usa ka mensahe nga angay unta naiwali niadtong miaging Dominggo, sa panihapon sa Ginoo. Pero gusto kong hisgotan kini sa medyo lahi nga anggulo sulod sa pipila ka minuto, samtang ginahiusa nato ang atong—atong mga hunahuna, sa pagsimba sa Ginoo.

²⁷ Mahimo kita, siyempre, nga magsugod sa lamesa sa Ginoo, tungod kay usa man kadto ka maanindot nga dapit nga mahinumduman natong tanan. Paghinumdum sa Ginoo sa Iyang lamesa, nga, mao gayud, ang ginapahinungdan sa teksto. Ug, kana, mao ang gisulti ni Pablo nga atong pagakuhaon ang copa ug—ug moinom sa—sa dugo, ug mokaon sa tinapay nga kosher, sa paghandum, aron sa paghinumdum sa kung unsay gibuhad Niya para kanato. Ug samtang—samtang ginabuhad n'yo kini, ayaw ninyo nga himoon kining ordinaryo lang, nga mora'g pang-adlaw-adlaw nga butang; kondili ginatinguha n'yo nga moduol gayud, tungod sa paghinumdum sa Ginoo. Kita n'yo? Hinumdumi n'yo nga ang Iyang grasya ug ang Iyang kalooy, ug kana lamang, ang nagahatag kaninyo sa bugtong paglaum nga aduna kamo. Bisan unsa pa ang buhaton ninyo, wala gayu'y unsa mang butang sa bisan asa ang makatugbang sa gibuhad ni Cristo alang kaninyo.

²⁸ Nagkaaduna ako og usa ka masubo nga kasinatian niining semanaha, ug bisan pa niana usa gyud ka mahimayaon nga kasinatian, ang masulti ko niini, ingon nga gilubong ko ang usa ka igsoon nga kaniadto ania dinhi kauban nato. Ug daghan man

sa inyo ang nahibalo sa maong panghitabo. Ang atong buotan nga Igsoong Rogers kadto, si Busty Rogers, pero ginatawag nato siya nga, Everett. Ug si Igsoong Banks Wood dinhi, ug si Igsoong Sothmann, magkauban kami nga nangadto sa maong panerbisyo sa paglubong.

²⁹ Ug—ug mibiyahe ako latas sa mga niyebe, paingon sa kanhing lugar kon diin ko siya unang gilusbog, mga bayntesingko na ka tuig ang milabay. Niadtong higayona sa dihang gilusbog ko siya, didto kadto sa lapokon nga tubig, sa Ngalan ni Ginoong Jesus Cristo. Samtang nagaagi kami sa karaan og pamilyar nga tulay didto sa Totten Ford, nakig-istorya ako sa mga kaigsoonan ko, ug miingon, “Usa ka adlaw kaniadtong may usa ka ministro sa denominasyon ang nagpahigayon og usa—usa ka dakung tolda didto, ingon siya, ‘Kanang dili-kasaligan nga tawo didto sa iglesiang Baptist, nga nagapangbautismo sa mga tawo sa Ngalan ni Jesus Cristo,’ ingon niya, ‘kung may si kinsa man nga nabautismohan sa ingon niana nga paagi, dili gyud nako abi-abihon ilalum sa akong tolda.’”

³⁰ Ug nahitabo nga niadtong higayona dunay pipila nga nagalingkod didto nga nabautismohan sa Ngalan ni Ginoong Jesus, ug si Igsoong George Wright kadto ug ang iyang pamilya. Sila gayu’y . . . Ang bugtong butang nga mahimo nila mao ang dili na mobalik pa.

³¹ Busa niadtong adlaw didto sa may suba, oh, gibiyaan niya niadto ang iyang panagtigum ug miadto didto aron medyo motan-aw lang, ug nagtindog pud ang kongregasyon niya didto. Ug miabot ko didto sa maong lugar. Ug nagaulan-ulan pa gani sa mga bungtod didto, ug ginapang-anod ang mga lapok sa kabukiran, paingon didto sa mga kasapaan nga mao’y nakapalapok gayud sa Blue River. Miubog ako ngadto sa tubig, nga mga taga-hawak ang kalawmon. Ug ako . . . Ang usa sa mga tinugyanan, o mga diyakono, diay, ang nagtunol sa ako og Biblia, ug akong gibasa kon diin gisulti ni Pedro niadtong Adlaw sa Pentecostes, “Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa mga sala, ug madawat ninyo ang gasa nga Espiritu Santo.”

³² Mao sàb kadto ang adlaw nga nagahigda didto si Georgie Carter, nga naningkamot nga maipataas ang iyang mga kamot, nagtimbang lang kaniadto og mga saisenta- ka libra, siyam na ka tuig ug walo ka bulan nga nagahigda lang sa katre, og wala nagalihok. Ug ang iyang mga paryente, ang iglesia nga iyang gipamiyembrohan, nag-ingon, nga kung may si bisan kinsa kono nga motambong sa akong panagtigum, pahawaon gyud kono sila gikan sa ilang pagpakig-fellowship sa maong iglesia. Ug busa niadtong mao ra mismong gabii naayo siya sa gilayon. Ug pagkahuman gusto niya nga magpabautismo sama niadtong batan-ong babayeng Nail nga atua didto; nga nakita ko sa usa ka panan-awon, ug kabalo na man mo sa maong estorya, mikulo

na ang iyang mga kamot ug mga bitiis; ug naanaa ako sa pananawon ug sa gahum sa Espiritu, gipandongan siya og mga kamot, og atua siya nga migawas ug naayo na. Ug miyembro siya sa mao ra nga iglesia. Bueno, usa kadto ka iglesiang Methodist. Ang ministro sa Methodist, nga si Igsoong Smith, mao ang nagatindog kaniadto sa may tampi kauban ang iyang kongregasyon.

³³ Ug nagsugod na ko sa pagbautismo sumala sa Biblia, sa Cristohanong bautismo. Ug niadtong mga orasa nga nakabautismo na ko og lima o unom ka tawo, og sa kalit lang nabungkag ang linya ug ang laray, didto sa bungtod. Atua na diay nagaabot ang grupo sa Methodist mismo nga sul-ob pa ang ilang maanindot nga mga sinina, aron magpabautismo sa Ngalan ni Ginoong Jesus. Ug tagsa-tagsa, mga gining nga nakasul-ob pa sa ilang maanindot nga seda ug pangting-init nga mga bisti, nangaubog didto niadtong lapok, samtang ginapahiran ang mga luha sa ilang nawong, ug ginatangtang ang lipstick, nangaubog didto aron—aron mohimo—mohimo og pagsugid ug—ug aron magpabautismo.

³⁴ Ug kauban niadtong nga grupo, ang usa ka kusgan, halapad ang abaga, nga mora'g pina-GI ang alut, laparon ang nawong, og kusgan nga lalaki nga miubog didto nga sul-ob pa ang iyang maanindot, asul nga terno nga amerikana. Ingon niya, “Ako, usab, nakadesisyon na.” Si Busty Rogers kadto, nga walay si bisan kinsa ang nagsulti kaniya og unsa man. Didto gilusbog ko siya sa Ngalan ni Ginoong Jesus Cristo, sumala sa iyang pagpamahayag.

³⁵ Ug niadtong miaging semana gipahimutang ko siya ilalum sa yuta didto sa Milltown. Ug namulong ako mahitungod sa wali nga: *Ang Kahingpitan Sa Pagkabanhaw*. Dugay na akong usa ka misyonaryo, ug nakakita na ko og nagkalainlaing mga diosdios ug mga pilosopo; ug mao lang gyud kana, gawas gani sa Cristianismo, usa lamang kana ka pilosopiya, nga nagatoo sila sa *ingon-ani*, *ingon-ana*, o *uban pa*. Apan ang gamhanang Magbubuhat Nga nagbuhat sa kabuhatan! Siguradong aduna gyu'y Magbubuhat kung adunay usa ka binuhat. Ug kung adunay binuhat, nan gibuhat kini sa usa ka Magbubuhat. Ug ang unsa man nga buhat sa tawo nagareplektar sa iyang kaugalingon. Kon usa siya ka maayo nga panday, nan maayo pud ang iyang trabaho, nagatukod siya. Ug kung usa siya ka maayo nga mekaniko, nan maayo pud ang iyang trabaho. Ang inyong tinrabaho nagareplektar lang kaninyo. Ug ang binuhat sa Dios nagareplektar mismo sa Dios. Ug gibuhat sa Dios ang tanang butang alang sa usa ka katuyoan. Ug ang tanan nga nagatuman sa katuyoan sa Dios, pag mamatay kini, aduna kini'y pagkabanhaw. Sultihi ko ninyo og usa ka butang. Ug magpresentar ko og daghang mga butang, sama sa mga bulak ug mga kahoy.

³⁶ Ug kung unsa nga nagasubang ang adlaw sa kabuntagon,

usa pa ka gamay'ng masuso nga natawo, mahuyang pa kini, ang mga silaw niini. Mga alas diyos, usa na kini ka batan-on. Ug inig ka alas dose nagasidlak siya diha sa iyang pagkakusgan, sa katahum sa babaye- o lalaki. Ug mga alas dos sa hapon, mora na kini og ako. Ug dayon mga alas singko sa hapon, mora na kini og lolo, nagasalop na kini. Ug sa katapusan nagakapalong na ang mga silaw niya sa yuta, ug mamatay na siya. Mao na ba kana ang katapusan niini? Natuman man niya ang katuyoan sa Dios. Gipatubo niya ang mga katanuman samtang nagasidlak siya sa yuta. Ang tanang mga tanum nga namatay niadtong miaging tuig, gibuhi niya. Mao na ba kana ang katapusan niya pag natuman niya ang katuyoan sa Dios? Nagasubang siya pag-usab pagkasunod buntag, nga may bag-ong kinabuhi! Mao sàb gihapon ang matag kahoy, ang tanang uban pa, ang tanan-tanan, ang bulan, ang mga bitoon, ang solar system, ang tanan dunay mga saad.

³⁷ Ug kung ginatuman sa usa ka tawo ang katuyoan sa Dios, aduna gyud siya'y pagkabanhaw sa ingon ka sigurado sama sa unsa mang butang. Ang bugtong butang nga kinahanglan buhaton, mao ang, ginahulat na lang sa Dios ang panahon, sama sa Iyang ginabuhat karon.

³⁸ Ngani bag-ohay lang nangahulog ang mga dagkung dahon sa mga punoan, o nangdagdag, diay. Kon diin ang pula, lunhaw, asul, kaphion, og tanang nagkalainlaing mga kolor sa halapad nga dughan sa yuta, kon diin ang kinaiyahan sa Dios napahimutang nga patay sa ilalum niini, basta gitatum lang sa Dios ang Iyang pungpong sa mga bulak. Tungod nasayod man Siya ang pag itanum Niya ang pungpong sa mga bulak, aduna ma'y pagkabanhaw sa panahon sa tingpamulak! Kinahanglan lang sa kalibutan nga motuyok sa orbit niini hangtud nga mobalik kini pag-usab kauban ang adlaw, ug motungha kini sa panglubong nga mga bulak.

³⁹ Mao nga ayaw mo pag-ingon, "Mao na kini ang katapusan," sama ra nga ang kaphion na, nga mga dahon sa kahoy, wala man nagaingon nga katapusan na. Ang bugtong butang nga kinahanglan niining buhaton, mao ang hulaton ang pagtuyok sa panahon sa Dios, hangtud sa panahon sa pag-abot sa Anak sa Dios. Ug ang matag buhi nga linalang nga namatay diha kang Cristo pagabanhawon. Sa Iyang Presensiya, ginahinumduman Siya. Oh, pagmoabot na ako sa katapusan niining akong panaw, gusto kong mamatay sa Iyang Presensiya, nga ginahinumduman Siya, nga Siya mao ang pagkabanhaw ug ang Kinabuhi. Siya Mao gayud.

⁴⁰ Dayon sa diha nga nagaduol na kita sa lamesa sa Ginoo. Ang lamesa sa Ginoo, sama sa ako nang pagpasabot niini dinhi kaniadto, dili man... Nagatoo kita nga ang ginatawag natong "ang komunyon" mao-mao ang pagkaon sa tinapay. Pero napahimutang nato ang sayup—ang—ang sayup...

Napahimutang nato ang husto nga butang sa sayup nga dapit. Dili man ang tinapay ang mahinungdanon, dili ang bino ang mahinungdanon, kanang kosher nga tinapay ug bino. Apan ang punto mismo, nga, ang *komunyon* nagakahulogan og “pagpakig-istorya,” ug, sa pagpakig-istorya Kaniya, ginahinumduman Siya. Sa tan-aw ko kini mao ang pinaka mapanalanginong oras sa mga buluhaton. Kita n’yo? Ang matag oras sa atong kinabuhi angay gayud nga mahimong usa ka pagkomunyon.

⁴¹ Ang pagpakig-komunyon sa Ginoo sama ra sa usa ka tubigan sa disyerto. Mora kini og tubod ilalum sa lim-aw, kon diin ang—ang magpapanaw nga nagaagi, mohunong gyud ug moinom sa tubig hangtud nga matagbaw ang iyang kauhaw. Ingon-ana ang paghinumdum sa Ginoo. Moduol diha sa kahan-ayan sa Iyang lamesa, kon diin ang nagaagi nga magpapanaw nga—nga lumalangyaw dinhi ibabaw sa yuta uban kanato, nga magkauban, nga mahimo kitang moduol sa Iyang lamesa, ug dinha magainom sa Iyang mga panalangin ug sa Iyang grasya ug sa Iyang Pulong, sa pagpakig-fellowship palibot sa Iyang Pulong, hangtud nga matagbaw ang atong nagakauhaw nga mga kalag. Ug dayon nagabiya kita sa maong dapit-simbahanan, nga pinalagsik ug pinatagbaw; og magapanaw na usab aron atubangon ang mga problema sa disyerto, ang mga problema sa disyerto sa kinabuhi. Oo, usa ka tubigan sa disyerto, nga ginapalagsik ang atong mga kaugalingon, ginatagbaw ang atong mga kaugalingon, sa dihang uhawon kita.

⁴² Kinahanglan ingon niana gayud sa matag magsisimba. Kini nagatag-... Ingon niana mismo sa matag tinuod nga magsisimba, nga nagatinguha sila nga magkatigum. Aduna gyu’y sa kung unsa man mahitungod sa pagpakig-fellowship nga—nga Balaanon, ingon nga gisugo kini sa Dios, ug balaan kini, sagrado. Ug ang mga matarung nagakauhaw niini.

⁴³ Sama sa gisulti ni David, nga ang iyang “kalag nangandoy sa pagpangita sa Dios, ingon nga ang lagsaw nangandoy sa pagpangita sa tubig.” Ang gamay’ng samaran nga lagsaw nga gipaak sa mga iro ang kilid niini, pero kini’y—nakalagiw kini. Ug nagatindog kini, nagahangos ug nagabantay. Ingon nga, nagasimhot pinaagi sa igbabati nga gihatag niini sa Dios, makasimhot kini og tubig bisan pila pa ka milya ang kalay-on. Ug ginayahat niini ang gamay’ng ulo niini samtang nagakawad-an kini og kinabuhi tungod sa pagdugo. Pero nasayod kini, nga kung makadangat lang kini sa maong tubod, nan mabuhi gyud kini. Wala na’y makagukod kaniya human niana. Kon makaadto lang siya sa tubig, nan malipat niya ang matag iro nga mogukod sa iyaha, kay nasayod man siya nga iyang—iya nang napalغان ang tubod nga nagahatag og kinabuhi.

⁴⁴ Ug pagmoabot na ang iglesia sa ingon-ana nga kahimtang, kon diin mahinungdanon kaayo si Cristo para kanato nga nagakauhaw gyud kita nga makaduol sa Iyang Presensiya ug

makauban ang matag usa, kini'y usa ka Tinubdan nga nagahatag og Kinabuhi. Wala gyu'y yawa ang makaduol kanimo. Bisan ang kamatayon mismo nabuntog na dinha. Oh, pagkaanindot nga paglaum! Pagkaanindot nga dapit! Ginapalagsik ang atong kaugalingon. Ug, sa pagbuhat niini, atong hinumduman nga si Cristo Mao Ang naghimo niini nga posible para kanato. Siya Mao Ang nagbuhat niining mga butanga para kanato, angay gayud nato Siyang hinumduman. Kay, hinumdumi n'yo, kita kaniadto nga nahimulag ug walay Dios, mga Gentil, nga nadala sa mga diosdios nga amang. Pero, hinumdumi n'yo, wala namatay si Cristo alang sa mga Judio, kondili alang sa matag linalang sa nahulog nga kaliwatan ni Adan, mao nga namatay si Cristo.

⁴⁵ Samtang ginahinumduman nato Siya sa Iyang tubod sa—sa komunyong, angay kini—kini nga magpahinumdum kanato niadtong panahon nga atua kaniadto ang Israel sa ilang pagpanaw. Ug nagapaingon sila, pero didto mismo sa linya sa pangatungdanan, sa pagpaingon nila gikan sa Egipto ngadto sa ilang kagawasan, paingon sa yutang saad, ug, sa ila mismong pagbuhat sa katungdanan, nawad-an sila og tubig. Ug mamala gayud ang matag makita nila, nga dapit, ang matag. . . ilalum sa matag bungtod kon diin angay unta nga adunay mga tubod, pero wala gayud. Ug halos mamatay na sila sa disyerto. Ug unya adunay mitungha nga Bato, nga gibunalan ni Moises kini nga Bato ug gikan niini midagayday ang madagayaon nga tubig. Ang matag lalaki nga giuhaw, matag babaye nga giuhaw, bata man, o bisan ang matag hayop nga giuhaw, mahimo gayu'ng moinom sa maong madagayaon nga tubig.

⁴⁶ Sama sa Juan 3:16, ang bulawanong teksto sa Biblia, miingon, “Tungod nga gihigugma gayud sa Dios ang kalibutan, gihatag Niya ang Iyang bugtong Anak, nga ang si kinsa man nga motoo (motoo, nagapakig-komunyong, nagahinumdum Kaniya) dili malaglag, kondili adunay Kinabuhi nga Walay Katapusan.” Hinumduman nato nga si Cristo mao ang atong Bato nga gibunalan, aron luwason ang usa ka nagakamatay nga kalibutan, usa ka nagakamatay nga Gentil, usa ka nagakamatay nga Judio, usa ka nagakamatay nga kalibutan. Gitugyan ni Cristo ang Iyang Kinabuhi sa kadagaya, aron ang tanan nga nagakagutom ug nagakauhaw, ang ingon sa propeta, “Ania, umari kamo sa tuboran, pumalit kamo Kanako og gatas ug dugos sa walay bili.” Umari kamo, tungod kay kini mao ang komunyong, umari kamo ingon nga paghandum sa Ginoo.

⁴⁷ Mahunahuna ko usab ang bahin sa paghandum sa Ginoo sa usa ka dapit nga pangpalagsik, sa atabay nga gitawag og *Beerlahairoi*, nga nagakahulogan sa pinulongang Hebreohanon, “Ang atabay Niya nga buhi ug nagatan-aw kanako.” Si Hagar, nga wala mahisabti, bisan pa niana anaa siya sa linya sa pangatungdanan. Wala mahisabti, gihukman nga sayup, ug gipapahawa, walay lugar nga maadtoan, kauban ang usa ka bata

nga hapit nang mamatay, ug nahurot na ang tubig sa sudlanan. Ug nagahilak na ang gamay'ng bata. Ug ang kasingkasing lang sa usa ka inahan ang nasayod kung unsa ang bation nga madungog kadto nga paghilak para sa tubig, samtang nagabutoy-butoy ang gamay niyang dila, ug nauga na ang iyang mga ngabil, ug nagakaluya na ang iyang bata sa matag gutlo. Gipapahawa, atua mismo sa linya sa pangatungdanan, og walay lugar nga maadtoan. Wala na gani siya miinom, mismo, hangtud nga gipuga na niya ang ulahing tulo sa ibabaw sa gamay niining nauga na nga mga ngabil. Ug pagkahuman namala na gyud ang sudlanan, ug gibutang niya kini ug padayon nga naglakaw. Ug nagahilak gayud ang gamay'ng bata para sa tubig, ug nagkaluya nga nagkaluya kini; ang iyang bugtong anak.

⁴⁸ Walay pagduhaduha nga mituaw ang inosente niyang kasingkasing, “Oh Dios, unsa ba’y nabuhat ko? Unsa ma’y nabuhat ko?” Ug dili man niya maagwanta nga makita ang bata nga mamatay na lang sa iyang mga bukton, mao nga gipahigda niya kini ilalum sa usa ka sapinit. Ug milakaw siya nga may gilay-on sa usa ka pagbuhi sa pana, tingali usa ka gatus ka yarda o sobra pa, ug nakakita siya og gamay nga punoan, ug miluhod siya ug didto misugod siya sa paghilak. Kay nahunahuna niya, “Ngano man gyud?” Kung gibuhat niya ang husto, nan nganong miabot man kini nga butang sa iyaha? Ngani sa makadaghang higayon mahunahuna pud nato kana sa atong mga balatian ug mga pag-antus, kita n’yo, apan tingali’g nagakahitabo kining tanan aron ipakita ang grasya ug kalooy. Ug samtang namalandong siya, nadungog niya ang mahinay nga mga paghilak para sa tubig, hangtud nga sa katapusan nawala na kini.

⁴⁹ Nadungog niya ang usa ka Tingog nga misulti ug miingon, “Nganong nagahilak ikaw? Unsa ma’y hinungdan nga nagahilak ka?”

⁵⁰ Ug mihangad siya, ug nakita niya ang atabay nga nagabugwak. Usa gayud ka tubod nga pangpalagsik! Beerlahairoi, tingali’g nasayup ko sa paglitok niana. B, duha ka e, r-l-a-h-a-i-r-o-i, nga nagakahulogan “Ang atabay Niya nga buhi ug nagatan-aw kanako! Siya nga dili mahimong mamatay! Melquisedec! El Shaddai! Siya nga buhi ug nagatan-aw kanako, nasayod mismo sa akong mga panginahanglan, nahinumduman Niya ako. Ug didto Iya akong nahinumduman maingon nga nahinumduman ko Siya, ug nasayod ako nga Siya buhi ug gipatungha Niya dinhi sa disyerto, kini nga atabay.”

⁵¹ Oh, mahimo natong iaplikar kana sa usa ka oras nga mensahe karon mismo, mahitungod sa niini nga panahon karon, kon diin ang disyerto sa mga kaiglesiahan, sa mga denominasyon, ug—ug ang—ang—ang mga magwawali sa pangkatilingban nga Ebanghelyo ug ang—ang mga urog sa

kalibutan nakasulod na, ug nahimo nang denominasyon ug nagkabalag-bulag.

⁵² Ug dayon ang hunahunaon nga ania pag-usab karong gabhiona, ang atabay Niya nga buhi ug nagatan-aw kanako. Mao kana ang angay'ng buot ipasabot sa paghinumdum kang Cristo para sa magsisimba. Oo. Oh, wala siya mahisabti ug gipapahawa. Miingon si Jesus, kaniadtong ania pa Siya sa yuta, "Ako mao ang buhi nga mga Tubig, Ako mao ang mga Tubig sa Kinabuhi."

⁵³ Ug gusto kong ipahayag ang usa pa ka diyutay'ng panghunahuna dinhi nga misantop sa akong hunahuna. Kaniadtong atua si Jesus sa usa ka pagbista, ug sa walay laing hinungdan kondili tungod ra sa pagbiaybiay, ni... Gipadala Siya gikan kang Pilato paingon kang Herodes. Bueno, dili man kadto kinahanglan buhaton ni Pilato, ug, kabalo mo, ingon nga gisulayan niyang manghunaw sa iyang mga kamot. Pero pag anaa na sa imong mga kamot, kinahanglan gyud nimong magdesisyon. Dili mo puedeng ituklod kini ngadto sa ubang tawo. Kondili ikaw gyud mismo, ingon nga usa ka indibiduwal. Pero Siya—gipadala Siya ngadto kang Herodes, aron—aron lang nga—nga biaybiayon, tungod kay nabantog man Siya ingon nga usa ka magbubuhay-og-milagro ug uban pa, ug usa Siya ka sinalikway sa iglesia. Busa si Pilato mismo, nahunahuna niya nga iyang ipadala na lang Siya ngadto kang Herodes, ug para tingali medyo ma-okey na pinaagi niadto ang dugay na nila nga pagdinumtanay, sa usa'g usa.

⁵⁴ Ug busa gidala si Jesus didto sa kadalanan ug didto sa mga lugar hangtud nga miatubang Siya sa mas hataas nga hukmanan, kang Herodes. Ug kaniadtong nahinagbo ni Jesus si Herodes, ug gipresentar na unta kang Herodes ang iyang bugtong kahigayonan! Pagkahangal gayud niya nga tawo? Kung nasayran lang unta ni Herodes nga ang nagatindog sa atubangan niya mao mismo ang katumanan sa matag Hebreohanong propeta, ang ginapangandoy, ang ginatinguha sa kalibutan, nagatindog mismo sa atubangan niya, ang katumanan sa gikasulti sa matag manggialamon ug propeta. Kahigayonan na unta kadto para matagbaw sa grasya ug kalooy ang iyang makasasala nga kasingkasing. Pero pagkahangal gayud niya nga tawo!

⁵⁵ Ug bisan pa man dili siya ingon kahangal sama sa tawo sa karong panahon nga gihatagan og mao gihapon nga kahigayonan tungod kay nagkaaduna man kita og sobra duha ka libo ka tuig sa Iyang pagtudlo, og sa Iyang kalooy. Apan daw sa—sa unsa ka hinangal nga butang ang gibuhay ni Herodes kaniadtong atua na unta siya sa atubangan ni Jesus ug wala man lang nangamuyo Kaniya alang sa grasya ug kalooy, wala gayud nangayo og kapasayloan alang sa iyang sala. Hinoon wala man siya nasayod nga ang nagatindog... Sa tan-aw ko wala gyud naamgo sa maong tawo nga ang nagatindog sa atubangan niya

ingon niadto diay nga matang sa Tawo. Ipatuhop sa nato kana sa makadiyut. Tungod kay ang mao nga Tawo wala ma'y ingon niadto nga—nga ngalan nga iya sa mga hataas og katungdanan sa katilingban, sa nagkalainlaing mga organisasyon ug—ug mga kapunongan, ug uban pa, nga Iyang gipasakopan. Wala Siya'y ingon niadto nga ngalan.

⁵⁶ Pero aduna Siya'y ingon niana nga ngalan, sa taliwala sa mga tawo nga nasayod sa Biblia ug nasayod sa saad. Ug buot kong isulti nga mas diretsahan, sila nga mga gipili-nang-daan ngadto sa Kinabuhing Walay Katapusan, naila nila kini dayon sa higayon nga mitindog Siya didto.

⁵⁷ Pero wala kini naila ni Herodes, wala man siya nasayod niini. Pagkasubo gayud. Ang tanan nga gipanulti sa mga propeta sulod sa upat ka libo ka tuig, ang katumanan sa pagtuaw sa kalibutan nagatindog mismo sa atubangan niya. Didto sa iyang atubangan atua mismo ang bug-os nga katumanan. Ug buot kong isulti kini pag-usab, hunahunaon nato nga usa siya ka hangal nga tawo tungod kay nagbuhat man siya og hinangal nga desisyon, kay, namatikdan ninyo nga wala gayud siya nangamuyo Kaniya alang sa kalooy. Mihangyo hinoon siya Kaniya nga—nga lingawon siya. “Oh, nakabalita ko nga Ikaw usa—usa kono ka magbubuhay og milagro.” Mihangyo siya og lingaw-lingaw imbis nga kalooy.

⁵⁸ Ingon niana ang kalibutan, sa karong panahon, ginapakita pag-usab ang mismong desisyon ni Herodes, sa diha nga masaksihan nila ang Cristo nga nagapamuhat-og-milagro nga nagabuhay og mao gihapong butang karon nga gibuhay Niya kaniadto, ug ang bugtong butang nga pangayoon nila, “Ipakita kanako nga ginabuhay mo ang *ingon niini-ug-ingon niana*.” Unya moingon mo nga dili maayo ang kahimtang nga madangatan ni Herodes? Mas samot pa gani ang kahimtang nga madangatan sa mga tawo niining panahona! Nagkaaduna si Herodes og upat ka libo ka tuig nga kasinatian, sa mga propeta ug mga manggialamon. Pero nagkaaduna kita og unom ka libo ka tuig, nga may labaw pa nga pagtudlo kaysa kanila kaniadto. Tinuod gayud. Grabe nga butang ang gibuhay niadto! Mao man usab karong panahona, mao ra mismo!

⁵⁹ Unsa ma'y nahitabo? Si Herod wala namalandong niadto nga seryoso. Wala gani siya mihunong man lang aron mamalandong.

⁶⁰ Ug ingon niana usab sa mga tawo karong panahona. Makita nila kining halangdong butang, nagpahikurat kini kanila, pero dili sila mohunong og ingon ka dugay. Nagasulay hinoon sila nga maminaw sa usa ka rabbi o usa ka teologo nga ginasaysay Kini pahilayo. Ug bisan pa man, pag mahunahunaan ko ang Jeffersonville: “Sa makadaghan nga buot Kong lumluman kamo sama sa usa ka himongaan nga nagalumom sa iyang mga piso, apan nagadumili kamo. Sa makadaghan nga buot kong lumluman kamo? Sa makadaghan nga buot ko untang himoon

kini nga—nga dapit nga tanaman kon diin ang tanang mga nasud mobiyahe paingon dinhi, apan nagadumili kamo.” Kita n’yo? Kita n’yo?

⁶¹ Karon, nakita n’yo na kung unsa ang kinahanglang hinumduman ni Herodes niadtong adlaw? Ang iyang dakung kahigayonan, nga iyang gibalibaran. Ug didto sa dapit sa mga nangalaglag, karong gabhiona, nahinumduman gyud niya kung unsay gibuhath niya kaniadto mahitungod niini. Pero ulahi na kaayo karon.

⁶² Ayaw n’yo tugoti nga mahitabo kanato ang ingon-ana. Mao na kini ang panahon nga giduaw kita. Hinumduman nato si Cristo, nga Siya mao sa gihapon kagahapon, karon, ug hangtud sa kahangturan, Mga Hebreohanon 13:8. Ayaw na paghulat nga mahiadto mo sa kung asa nga dapit didto, sa mga nahinukman, sa nianang dimensyon kon diin dili na kamo makaadto sa Presensiya sa Dios, ug ingon nga natapos na ang inyong panahon sa yuta, nan sa makahahadlok nga damgo mahinumduman ninyo nga nagkaaduna diay kamo og kahigayonan pero inyo kining gibalibaran. Himatikdan unta kini sa mga kabatan-onan. Himatikdan kini sa tanan.

⁶³ Wala gyud kini seryoso nga gihunahuna ni Herodes kaniadto. Tungod nga sa iyang bugtong kahigayonan, naghangyo lang man siya nga malingaw, ug nga tingali’g mobuhath si Jesus og usa ka matang sa salamangka, mokuha og rabbit gikan sa kalo, o, kabalo na mo, o morag ingon-ana. Gihunahuna niya nga tingali si Jesus, sa laing pagkasulti, giisip niya Kini nga sama ra sa usa ka salamangkero. “Nakabalita kami nga makabuhath Ka kono og mga pasiauw. Ipakita kanako karon nga ginabuhath Mo ang Imong pasiauw.”

⁶⁴ Ug buot kong isulti kini nga may pagtahud. Pero pila na kaha ka higayon nga ang mga nagpatawag nga ministro niining panahona, miingon, “Kung aduna ma’y Espiritu Santo, kung nagatoo ka nga ang Espiritu Santo sama lang gihapon kaniadto sa sinugdanan, nan ipakita kanako nga imong ayohon ang tigulang nga si *Ingon niini-ug-ingon niana* dinhi, o *kini*, oh, *kini* nga lalaki dinhi, *kini* nga babaye dinhi. Adtoon ko og kuhaon sila. Ipakita kanako nga ginabuhath mo kana.”

⁶⁵ Naamgo kaha nila nga mao gihapon kana nga espiritu (wala, wala nila naamgo) nga miingon kang Jesus, “Kung Ikaw ang Anak sa Dios, kuhaa, himoang tinapay kining mga bato. Kung Ikaw ang Anak sa Dios, sultihi kami kung kinsay nagbunal Kanimo sa ulo. Kung usa Ikaw ka Propeta, sultihi kami kung kinsay nagbunal Kanimo,” nga gitabonan og trapo ang tibuok Niyang nawong. Gibunalan Siya sa ulo, ug gipasa-pasa dayon nila ang bunal sa usa’g usa, og miingon, “Sultihi kami, kung usa man Ikaw ka Propeta. Sultihi kami kung kinsay nagbunal Kanimo, dayon motoo na kami Kanimo. Sultihi kami, kung

Ikaw man ang Anak sa Dios. Matinud-anon kami sa among mga kasingkasing. Kung Ikaw man ang Anak sa Dios, nan kanaug sa krus ug motoo na kami nga Ikaw ang Anak sa Dios.”

⁶⁶ Nahunahuna ko kung dili ba kaha daghang mga tawo sa karong panahon, mga kalalakin-an, mga kababayen-an, mga batan-on ug mga tigulang, ang anaa sa mao gihapon nga kahintang. Ug mahinumduman ninyo, sa umaabot nga adlaw, nga naanaa kamo sa Iyang Presensiya, sa Iyang Tuboran; pero gusto ra ninyo nga makakita og pasiaw, o gusto ra makakita og salamangka o mora’g ingon niana, “Makapahimo kana kanako nga motoo Niini. Ipabati sa ako nga mamugnaw ang akong likod, ug ipabuhat sa ako ang *ingon niini* o *ingon niana*, og motoo na ako Niini.” Kita n’yo, ang unsa man nga sensasyon, bug-os gayud nga pagsimba ra sa diosdios! Tugoti akong. . .

⁶⁷ Kabalo mo, miingon si Jesus sa usa ka panghitabo, nangutana Siya og usa ka pangutana. Gusto kong ipangutana pud kini sa iglesia karong gabhiona. Miingon si Jesus, “Nganong? Nganong? Nganong ginatawag n’yo Ako nga inyong ‘Ginoo,’ ug dili man ninyo ginabuhat ang mga butang nga gisugo Ko kaninyo nga buhaton? Nganong ginatawag n’yo Ako nga ‘Ginoo,’ ug dili ginatuman ang Akong Pulong? Nganong ginatawag n’yo Ako nga ‘Ginoo,’ ug ginapanghimakak ang mga butang nga gisugo Ko kaninyo nga iwali ug itudlo?” Unsa man kini? Unsa ma’y hinungdan niini? Kini’y tungod kay duna ma’y pipila ka tradisyon sa denominasyon nga nagapatunga tali kanila ug sa Pulong. Ug ang unsa man nga nagapatunga tali kaninyo ug sa Dios, usa kana ka diosdios, tungod ginapulihan man niana ang Dios. Nganong nagatawag kamo og, “Ginoo”? Ang *Ginoo* nagakahulogan og “may panag-iyá,” panag-iyá sa Ginoo ang maong kabtangan. Ug kung panag-iyá ako sa Dios, kung Iyaha ako, ug giusab Niya ako usa ka adlaw kaniadtong anaa ako sa sayup nga dalan, ug gitawag ako alang sa usa ka katuyoan, nan ang kinahanglan kong buhaton mao ang tumanon ang Iyang tinguha, sama sa gibuhat Niya kang Pablo. Unsa pa ma’y ubang butang nga mahimo ko gawas sa pagtuman sa Iyang Pulong? “Nganong ginatawag n’yo Ako nga ‘Ginoo’?”

⁶⁸ Gusto kong hisgotan ang usa pa ka tawo dinhi, hibaloon ta ang mahitungod kaniya. Unsa man usab si Judas, unsa ma’y kinahanglan niyang mahinumduman mahitungod kang Jesus? Nagahisgot kita mahitungod sa paghinumdum sa Ginoo. Si Judas karong gabhiona ug, oh, hangtud nga namatay siya, siguradong mahinumduman niya nga gibaligya niya ang iyang mga katungod sa pagkapanganay. Gibaligya niya si Jesus para lang sa pang-personal nga interes. Ginasaway nato si Judas. Ginaingon nato nga siya’y mahugaw, dautan nga lalaki, dili siya angayan para sa unsa man nga lugar o unsa man nga katilingban, dili siya angayan para sa Langit. Ngano man? Gibaligya niya ang iyang Ginoo, human nga nagkaaduna siya og kahigayonan

nga mahimong usa—usa ka tinun-an, nga mahimong usa ka apostoles, ang pinakahataas nga pagtawag sa Biblia, mas hataas kaysa usa ka propeta. Nagkaaduna siya og kahigayonan nga mahimong usa—usa ka apostoles, pero gibaligya niya kana nga katungod para lang sa pang-personal nga interes. Ug karon kinahanglan niyang mahinumduman kana. Sa ingon-anang paagi niya mahinumduman si Jesus: pang-personal nga interes.

⁶⁹ Ug pila kaha kanila karong gabhiona ang nagatindog gihapon sa pulpito, nagasul-ob gihapon og kupo para sa choir, nagalingkod sa lingkoranan sa diyakono, o nagabuhat sa katungdanan sa pagka-tresurero, tinugyanan, o unsa pa man, ang iyang katungdanan sa iglesia, o kaha ministro sa pulpito, nga ginabaligya gihapon ang iyang kahigayonan para lang sa pang-personal nga kadungganan, “Doktor, Obispo *Ingon nini-ug-ingon niana*,” para lang sa pang-personal nga kadungganan, pang-personal nga interes.

⁷⁰ May usa ka tawo nga miingon kanako usa ka higayon, “Nagatoo ko nga Kamatuoran kana. Pero kung iwali ko kana, nan manglimos na ko dinha sa kalsada.”

⁷¹ Mahinumduman pa ba ninyo ang mahitungod sa tawong dato ug si Lazaro, kung unsa ang ilang kaulahian ug Eternal nga nadangatan? Bisan pa ang usa adunay. . . usa ka makililimos, ug ang usa pa maoy tawong dato, apan nausab ang eksena usa niana ka adlaw ug pareho gyud sila makahinumdum. Bueno, ginasaway sa mga tawo karong gabhiona si Judas tungod nga gibaligya ni Judas si Jesus para sa pang-personal nga interes ug daghan kaayo nga mao sàb gihapon ang ginabuhat sa karong panahon, ginabaligya Siya para sa pang-personal nga interes.

⁷² Mahinumduman usab sa sacerdote niadtong mga adlaw nga gibaligya nila ang ilang kahigayonan Kaniya, ang ilang kahigayonan nga mahimo untang alagad Niya, nga mahimong Iyang tinun-an, nga mahimong usa ka kinabig ngadto Kaniya. Pero gibaligya nila kini tungod sa lunhaw'ng hilo nga kasina. Nasina sila sa Iyang Doktrina. Aba, kaniadtong dose anyos pa lang Siya, malabwan na Niya sila sa unsa mang paagi; ug wala gihapon sila nakaila, nga ang Mesias na kadto. Dili nila mahimo ang mga butang nga ginabuhat Niya. Ug nahadlok sila nga mawala sa ilaha ang ilang kadungganan sa atubangan sa mas hataas nga mga tawo, ug gibaligya nila ang ilang kahigayonan. Ug sila'y ingon gayud ka sad-an usab nga sama ni Herodes.

⁷³ Ug mao sàb gihapon ang miyembro sa iglesia karong panahona. Kung misalig sila sa ilang mga denominasyon ug uban pa, kaniadtong mga panahona, ug nahadlok nga mawad-an sa ilang—sa ilang kadungganan, nga papahawaon sila gikan sa mga sinagoga, unsa diay kadto? Kadto mao'y pagsimba og diosdios! Nagasimba sa usa ka diosdios nga kredo o sa usa ka diosdios nga

pang-simbahan nga relihiyon, imbis nga dawaton ang buhi nga Pulong nga napadayag sa atubangan nila.

⁷⁴ Ug nakita nila mismo ang Pulong sa Dios. Ang Biblia miingon, “Nakita nato Siya ug nahawiran Siya.” Nahawiran sa mga kamot sa mga tawo kaniadto ang literal, nga buhing, napadayag nga Pulong sa buhi nga Dios; pero gitugotan ra ang mga tradisyon ug mga kredo nga magpatunga kanila, pagpanghugas og mga kolon ug mga kalaha, pagkahugaw nga butang ang nagpatunga tali kanila ug sa buhi nga Dios. Oo.

⁷⁵ Unsa man kadto? Sila’y mga madinauton. Madinauton sila batok sa Iyang mahinlo, og tataw nga Ebanghelyo nga Kasulatan nga Iyang ginatudlo, ang Pulong sa Amahan. Nasina sila Kaniya. Madinauton sila Kaniya. Ug samtang aduna sila’y paghinumdum, nga, bisan hangtud sa impiyerno mahinumdum gayud sila, sa ingon niana pud sila mahinumduman. Sa ingon niana nila mahinumduman Siya.

Moingon mo, “Oh, ang mga Fariseo man kadto.”

⁷⁶ Adunay usa ka luoy’ng babaye nga nagatambong kaniadto dinhi sa iglesia. Oh, sa hunahuna ko daghan siguro sa inyo ang nakaila sa iyaha, nagapuyo siya sa may kalye dinhi dapit. Nahitipas na siya. Ug sa matag higayon nga makita ko siya, moduol siya sa ako, gunitan sa iyang mga kamot ang akong kamot, “Igsoong Bill, iampo ako. Nag-backslide na ko.” Ang iyang bana usa ka . . . Dili, sa tan-aw ko nagapuyo sila dinhi mismo niini nga kalye. Nakita ko siya diha sa Espiritu, nakita ko ang Espiritu sa Dios diha kaniya, ug nagasayaw siya, nagakalipay, ug uban pa. Pero siya’y nahitipas na. Ug nagahigda siya bag-ohay lang sa ospital dinhi, naghimalatyon na, mao’y pagdahum nila. Ug gipatawag niya ako para moadto og iampo siya.

⁷⁷ Siya ug ang iyang bana maayo kaayo sa akong asawa, kaniadtong ang akong asawa, usa pa ka bata, nga nagkagidlay, bulingit nga batang babaye, ug ginapalitan nila siya og gamay’ng bistida o ingon niana usahay, para tabangan siya nga makaadto sa eskwelahan. Bisan unsa man kagamay kini, dili ka makahimo og usa ka butang para sa Dios nga dili Niya mahinumduman. “Sa pagkaagi nga gibuhat ninyo kini ngadto niining Akong labing mga gagmay, gibuhat ninyo kini Kanako.” Ug sama sa tinapay sa katubigan, magabalik kini.

⁷⁸ Atua didto kining luoy’ng, gamay’ng, babaye nga nag-backslide na, nagahilak, nga nagahawid sa akong kamot. Ug siya . . . ingon ko, “Bueno, igsoon, ako’y—mag-ampo ako para kanimo.”

⁷⁹ Ug atua pud sa tupad niya nga higdaanan ang usa ka babaye nga nagahigda didto nga naka-krus ang mga kamot, nagatutok sa ako. Ug nagalingkod tupad niya ang iyang batan-ong anak

nga lalaki, nga mga baynte anyos, usa ka modernong hitsurang-Ricky.

⁸⁰ Bueno, dili ingon nga wala na ko'y respeto sa kang kinsa man nga Ricky ang ngalan, pero ang buot kong ipasabot nga usa kana ka. . . wala gyud mo'y madungog og ingon nianang ngalan sa nangaging mga panahon. Ang Elvis ug Ricky, mga ngalan kana sa niini nga kapanahonan, nakita n'yo. Kung duna kamo'y anak nga ginganlan n'yo og ingon niana, nan tawaga siya sa iyang tunga'ng-ngalan, ingon-ana, o kaha hinganli n'yo og lahi.

⁸¹ Bueno sa nagalingkod siya didto nga nakaingon niana, nagatutok, ug gisugdan ko nang iduko ang akong ulo, ug nakita ko siya nga nagatutok gayud. . . Ingon niya, "Kadali lang! Biraha kanang kurtina!"

⁸² Miingon ko, "Maghalad lang ko og pag-ampo para sa babaye. Dili ba—dili ka ba usa—usa ka magtotoo?"

⁸³ Ingon niya, "Sultihan tà ka ha, mga Methodist kami, ug gusto namo nga birahan mo kanang kurtina!"

"Oo, ma'am," ug gibira ko ang kurtina.

⁸⁴ Kita n'yo, mao ra mismo. Mao ra gihapon sa karong panahon, madinauton gayud! Giunsa man niya pagkahibalo kung unsa ako nga matang nga ministro? Wala ko pa nakita sukad-sukad ang maong babaye. Pero tingali'g nakadungog siya nga adunay miingon nga nagatoo ako sa pagpang-ayo sa mga may sakit, ug natudloan siya og batok niini. Ayaw niya nga aduna siya'y kahilambigitan niini, nanghunaw siya para matangtang kini sa iyang mga kamot. Nahadlok siya nga moabot kadto sa iyaha. Ayaw'g kabalaka, dili kana moabot, sama ra nga dili mahimo ni Pilato nga manghunaw para matangtang kadto gikan sa iyang mga kamot.

⁸⁵ Karon, wala ko nagasulti og unsa man nga kaulawan mahitungod sa mga Methodist; usa ka babaye lang kadto. [Blangko nga bahin sa teyp—Ed.] Kita n'yo? Basin ingon niadto lang gyud ang iyang taras. Sa hunahuna ko ang tanang mga Methodist dili man ingon niana, tungod kay naiampo ko na ang daghan kanila. Ginatawagan nila ako aron iampo sila, ug napamuhat sa taliwala nila ang mga ilhanan ug mga katingalahan. Mao nga dili kini ang mga tawo nga anaa niana nga mga iglesia; kondili ang sistema kini diin sila napailalum, mao kana ang nagapahinungdan niini. Pero usa siya sa ingon niadto nga matang. Unsa man kadto? Puro nga lunhaw'ng-mata nga hilo, giyawaan nga kasina.

⁸⁶ Aduna ko'y isulti nga usa ka butang. Sa—sa usa ka panagtigum dinhi sa siyudad usa ka higayon, ug nangutana sila kung nganong wala nila ako gidapit niadto. Pero ipalabay ko na lang kadto tungod kay ania man ako sa atoa. Apan, ug bisan pa niana, wala gyu'y hinungdan, kasina lamang kini, kini'y kredo, kini'y pagsimba og diosdios. Ngani gusto gayud unta natong

hangopon ang matag usa, pero kon ginalikayan ka . . . gitinguha man sàb ni Jesus nga buhaton ang ingon-ana. Hinumdumi n'yo, sa umaabot nga adlaw sigurado nga mahinumduman n'yo kana. Sigurado nga mahinumduman gyud ninyo kini.

⁸⁷ Nahinumduman ko lang ang usa ka testimonyo nga gipahayag bag-ohay lang. May usa ka ministro, nga anaa sa elevator nga nagapasaka, dinhi sa may Heyburn Building. Ug dunay tulo ka lalaki nga nagatindog uban niining ministro nga anaa sa—anaa sa elevator, ug sila—wala sila kahibalo nga kini nga lalaki usa diyay ka ministro, mora'g wala gyud. Ug samtang nagapasaka sila, mihunong silang tanan sa ikawalo nga andana. Ug mitan-aw ang usa ka lalaki ngadto sa ministro, ug miingon, “Kabalo ka kung unsa? Kini'y ingon ka haduol na sa Langit nga atong maabtan.”

⁸⁸ “Bueno,” miingon ang ministro, “Ako—sa tan-aw ko husto ka. Ako—sa tan-aw ko husto gyud ka, kay samtang nagasalig kita sa mga nabuhat nato mismo, mao na kini ang pinakahaduol nga maabtan nato.” Husto kana. Samtang nagasalig ka sa kung unsay imong ginabuhat, ginahinumduman nimo kung unsay imong gibuhat. Ug sigurado ko nga nasayod ang kadaghanan sa ato nga wala gyud kita'y bisan unsa man nga nabuhat, mao nga dili gyud kita'y takus sa unsa mang butang. Ingon pa, “Sa tan-aw ko kung nagasalig kita sa mga nabuhat nato mismo, nan mao na kini ang kalay-on nga maabtan nato.” Bueno, kung nagasalig kita, mao ra gyud kana ang kalay-on nga maabtan nato.

⁸⁹ Pero, oh, aduna ko'y gustong isulti. Kung hikalimtan ko lang kung unsa ako, ug hinumduman kung unsa Siya, kung mahinumduman ko si Jesus, kung mahinumduman ko Siya sa krus, kung mahinumduman ko kung unsay gibuhat Niya para kanako, ug mahinumduman ko ang oras nga giwagtang Niya ang akong mga sala, ug gihatag kanako ang Balaang Espiritu aron mogiya kanako, kung ingon-ana ginapataas ako ibabaw sa tanang butang nga anaa niining kalibutana. Ginapataas ako ibabaw sa matag yutan-ong butang, paingon sa Langitnong mga dapit diha kang Cristo Jesus, kon diin mahimo akong magpakig-fellowship Kaniya. Didto sa Iyang Presensiya, nga ginakalimtan kung unsa ako kaniadto, ginakalimtan ang tanan kong mga sala ug tanan na, tungod kay ang mga niini anaa na man sa Dagat sa Pagkalimot. Ginakalimtan ang tanan kong kagahapon, ginakalimtan ang tanang butang, ug ginahinumduman nga gihimo Niya akong Iyaha, pinaagi sa Iyang Kaugalingong kamatayon. Mipuli Siya kanako. Ug ako nga walay katungod nga moadto sa bisan asa kondili sa impiyerno, mipuli Siya kanako ug gipataas ako gikan sa impiyerno. Miadto Siya didto para kanako. Ug gipataas Niya ako pinaagi sa Iyang madagayaon nga grasya, nga hangtud karon kita'y mga anak nga lalaki ug mga anak nga babaye sa Dios, ug nagalingkod kita sa Langitnong mga dapit diha kang Cristo Jesus, nga kanunay'ng nagakalipay

ug ginahinumduman Siya Nga nagluwas kanato hangtud karon. Ug sa nagapitik nga pagtoo sa kinasuloran sa atong mga kalag, ginapapadayon kita, ug pinaagi sa grasya padayon Niya akong pagadad-on.

⁹⁰ Ug pinaagi sa mga mata sa pagtoo nakita ko ang Iyang Kasulatan nga nagakatuman, “Ang tanan nga Iyang mga giilang-nang-daan, Iyang gitawag; ang tanan nga Iyang mga gitawag, Iyang gimatarung; ug ang tanan nga Iyang mga gimatarung, Iyang gihimaya.” Busa sa paghunahuna niini, nagatindog ako sa kongregasyon sa maong mga tawo, kon diin anaa ang Espiritu sa Dios, ug gipataas aron magalingkod sa Langitnong mga dapit diha kang Cristo Jesus. Ginahulat ang takna kon kanus-a kining dautang porma sa kinabuhi sa tawo nga dunay mortal nga pitik sa kasingkasing, kinahanglan nang mohunong sa umaabot nga adlaw, sa diha nga kini’y pagausabon na ug hatagan na og usa ka kasingkasing nga iya sa Espiritu nga magapitik sa tibuok walay katapusan nga panahon og lagpas pa niana, nga wala na’y sakit, wala na’y kasub-anan, wala na’y pagkatigulang o unsa pa man.

⁹¹ Hinumdumi n’yo si Jesus. Pag mahutdan na ang tadyaw sa balay, ug wala na’y harina, hinumdumi n’yo si Jesus. Pag moingon ang doktor nga wala na’y paglaum, hinumdumi n’yo si Jesus. Pag ginatintal kamo sa yawa; samtang ginaawit nato ang atong pangpauli na nga alawiton, “sa diha nga ang mga panulay magapalibot kanato, litoka lang diha sa pag-ampo ang maong Balaan nga Ngalan.”

⁹² Ginahinumduman si Jesus, ginahinumduman nga moanhi Siya pag-usab. Ang mao ra nga Jesus nga gikuha kanato magabalik pag-usab sa mao rang paagi nga nakita nato Siya nga mikayab sa Langit. Hinumdumi n’yo, magabalik Siya alang niadtong mga Iya.

⁹³ Mag-ampo kita. Ug samtang nakaduko ang atong mga ulo, ug samtang anaa pa sa inyong kasingkasing kining hamubong putol-putol nga Mensahe, gusto ba ninyo nga hinumduman Niya kamo karon? Kung gusto ninyo, ipataas lang ang inyong mga kamot, ug ang usa ka espesyal nga hangyo, “Ginoo, hinumdumi ako.” Maingon sa gisulfi sa magbabalak, “Hinumdumi ako sa diha nga nagatulo na ang akong mga luha.”

⁹⁴ Among Labing Balaan nga Amahan, labihan gayud kaming nalipay sa Presensiya sa Balaang Espiritu, samtang ginapakita Niya kanamo ang Pulong sa Kinabuhi, samtang ginahinumduman namo ang gahong kon diin kami gikuha ug nakuha na karon gikan sa maong gahong ug gihulma nga mamahimong mga anak sa Dios, pinaagi sa grasya ni Jesus Cristo. Nahinumduman ko Siya, kaniadtong mitan-aw sa akong nawong ang usa ka doktor ug miingon, “Pipila na lamang ka minuto,” nahinumduman ko si Jesus. Nahinumduman ko si Jesus kaniadtong atua ako sa altar nga nagatuaw alang sa kalooy

ug ingon nga nabug-atan ang akong kalag, nahinumduman ko ang kabug-aton nga nawala na kanako. Gikuha ni Jesus ang akong kabug-aton. Pipila na ka bulan ang milabay, samtang nagalingkod ako sa bangko, nga ginatan-aw ang teleskopyo sa tubo sa pusil, aron pusilon ang usa ka target, ug nahunahuna tingali ni Satanas, “Mao na kini ang akong kahigayonan.” Ug sa pagbuto sa pusil, ug ang tubo ug ang pulohan ug ang gato sa pusil nanglagpot gayud sa matag direksyon, ug nanglagsik ang kalayo sa tibuok kong lawas, ug misulay ko sa pagtindog, ug mibugwak ang dugo, nahinumduman ko si Jesus mismo. Sa dihang ang doktor, sa pagtan-aw niya ug nakita nga walay kadaut nga nahitabo, miingon siya, “Ang bugtong butang nga nahibaloan ko, siguradong nagalingkod usab ang Ginoo, didto, aron panalipdan ang Iyang alagad, kay kon dili nabungkag na gayud unta siya sa ingon niadto nga pagbuto.” Oh Dios, nahinumduman gayud namo ang maong mga butang!

⁹⁵ Nagaduol kami sa Tuboran nga puno sa Dugo, nga gikan sa kaugatan ni Emmanuel. Panalangini kaming tanan, Ginoo, karong gabhiona. Nasayod Ka sa—sa tinguha ug sa katuyoan sa matag kasingkasing nga nagpataas og kamot. Nasayod Ka sa tinguha ug sa panginahanglan. Ug ingon nga Imong alagad, Ginoo, ako—nagaduol ako kauban sila, ug—ug gikan dinhi sa tabernakulo karon, pinaagi sa pagtoo, mopaitaas kami, nga lagpas pa sa mga panganod ug bulan, ug mga bitoon ug sa—sa Milky White Way, ug karon nakadangat na kami sa Presensiya sa Dios. Ug ania sa atubangan ko ang usa ka bulawanong altar, dinha napahimutang ang Halad nga among ginahinumduman, si Jesus, nga miingon, “Pangayo lang kamo sa Amahan og bisan unsa sa Akong Ngalan, Akong—Akong ihatag kini.” Ayaw itugot nga mapakyas ang among pagtoo, Ginoo, kondili hinumduman gyud namo nga madawat namo kung unsay among ginahangyo, kung toohan namo kini, samtang ginahinumduman namo nga si Jesus namatay aron siguradohon kini para kanamo ug para himoon kining sigurado.

⁹⁶ Ginoo, nakita namo nga Imong ginapadak-an ang among bilding. Ikaw ang nagbuhat niini para kanamo, og naghatag kanamo niini nga pagpadaku sa simbahan. Ug nasayod kami nga Ikaw gyud, Ginoo, Ang naghatag kanamo og simbahan sa sugod pa lang. Ginaampo namo nga panalanginan Mo unta kini nga mga pagpaningkamot.

⁹⁷ Ginoo, ginaampo pud namo ang among pastor, si Igsoong Neville, ang Imong mapaubsanon ug buotan, maunongon nga alagad. Nga andam moalagad bisan unsa man ang katungdanan, bisan pa kung kini’y dinha sa may luyo nga lingkoranan o kung pagpanglimpyo man kini sa simbahan. Sa bisan asa Mo Siya kinahanglanon, dinha ginatinguha niya nga mamahimong instrumento, aron alagaran Ikaw sa kon asa Ka man magatawag. Ginaampo namo, Dios, nga—nga panalanginan Mo siya.

⁹⁸ Dios, kining dakung pagsulay nga bag-o ko lang naagian, ug tungod niining mga tinugyanan nga miunong kanako, ug niining iglesia nga—nga nag-ampo para kanako, ug sa katapusan miabot gyud ang kadaugan. Oh Dios, ginaampo ko sila. Ginahinumduman ko sila, usab, Ginoo, ug sigurado ko nga Ikaw usab.

⁹⁹ Ginahinumduman namo kung unsa nga nahimo Ka gayud nga panalangin kanamo. Ug ginahinumduman namo ang Imong Pulong, nga dili Mo kami biyaan ni talikdan kami, walay unsa man nga kahilambigitan niini ang pagkatigulang, pagahinumduman Mo gihapon kami, sa diha nga mahanaw na ang kalibutan ug ang panahon mahanaw na paingon sa Eternidad. Ngani nahisulat man ang mora'g ingon niini: “Malimot ba sa usa ka inahan ang iyang masuso nga bata? Ako dili gayud malimot kanimo, naikulit na ikaw sa mga palad sa Akong mga kamot,” ang mga lansang nga nagkulit sa among mga ngalan. Nasayod kami nga ginahinumduman Mo kami, Ginoo.

¹⁰⁰ Ug hinaut nga maanaa Ikaw kanunay sa among pinakabililhon nga panumduman, ingon nga among Manluluwas, among Mananambal, among Hari, among Hinigugma, among Kinabuhi, among Sidlak-sa-adlaw, ang among Tanan-Tanan, kanang dili-mahurot nga Tuboran sa grasya ug gugma sa Dios nganhi kanamo nga mga nahulog nga mga tawo sa pamilya ni Adan. Itugot kini, Ginoo, samtang ginatugyan namo ang among mga kaugalingon nganha Kanimo karon, sa paggikan namo sa tabernakulo karong gabhiona, nga ginahinumduman si Jesus. Amen.

¹⁰¹ Ginahinumduman n'yo ba Siya? Ginahigugma n'yo ba Siya? [Nagaingon ang kongregasyon, “Amen.”—Ed.] Karon sa hunahuna ko, sa atong hamubong putol-putol nga Mensahe, buot natong isulti kini. Miingon si Pablo, “Bisan unsa ma'y buhaton nato, buhaton nato sa Espiritu.” Sa tanang butang angay nato Siyang hinumduman. Dili kita mohimo og desisyon gawas kon mahinumduman nato Siya; dili sa kita magbuhat og bisan unsa, tungod kay mamahimo kini nga dinali-dali. Kung sagpaon sa kaaway ang usa ka aping, hinumduman sa nato ang gibuhat Niya adisir kita mobalus. Hinumduman nato ang Iyang buhat. Kung aduna ma'y desisyon nga pagahimoon, maghulat sa kita, hinumduman nato kung unsa nga matang sa desisyon ang sa hunahuna nato nga pagahimoon Niya, pagkahuman mao kana ang mamahimo natong desisyon. Kung magmadali-dalion kita, nan hinumdumi n'yo nga wala gayud Siya sukad nagdali-dali. Kita n'yo? Kung mabalaka kita pag-ayo, hinumdumi n'yo nga nagapuyo Siya sa Eternidad, dili igsapayan Kaniya ang oras. Ang katuyoan ug tinguha kini sa atong kasingkasing. Hinumduman nato Siya.

¹⁰² Ug hinumduman nato Siya karon samtang ginaawit nato kining awit diha sa Espiritu sa Iyang Presensiya, *I Love*

Him. Kung nagapuyo kamo sa gugma, nagapuyo kamo sa Dios, kay gugma man ang Dios. Ang nagapuyo sa Dios nagapuyo sa gugma. Kita n'yo? Ug ang gugma walay pagdumot. Ang gugma dili masinahon. Ang gugma dili tigpagawal. Ang gugma dili magagawi og kalaw-ayan. Ang gugma kanunay'ng maaghop, malumo, mapasayloon, buotan. Bisan unsa pa ka maligutgoton ang uban, nagapabilin mismo ang gugma. Ang gugma mao ang pinaka-pangtapos sa grasya. Ang gugma mao ang pinaka-pangtapos sa Dios para kanato. Human nga mahanaw ang tanang uban pa nga mga gasa ug mga ingon-anang butang, ang atong mga propesiya, ang atong pagsulti og laing mga dila, ang atong mga paghubad niini, ang tanang mga nabuhat nato, o unsa pa man, pag nagaabot ang gugma, kini mao ang pinakapanapos. Kini'y labaw sa tanan, tungod ang tanang uban pa nagakapakyas man. Kini mao—kini mao ang desisyon sa Kinatas-ang Hukmanan. Kini mao ang Haligi nga hikotanan. Kini mao ang Bitoon sa Amihanan nga nagapapabilin sa mga marinero sa ilang direksyon. Kini mao ang Kompas nga nagatultol kanato. Ang gugma ang pinakapanapos. Hinumduman nato kini samtang ginaawit nato ang, "I love Him."

I love Him, I love Him
Because He first loved me
And purchased my salvation
On Calvary's tree.

I love Him, I love Him
Because He first . . .

Karon hinumdumi, "Gihigugma Niya ako, ug gihatag ang Iyang Anak."

And purchased my salvation
On Calvary's tree.

¹⁰³ Karon samtang ginatono sa atong igsoon kini nga awit para kanato . . . [Ginalaylay ni Igsoong Branham ang *I Love Him*—Ed.] Diha sa kalumo sa pagpakig-fellowship, samtang nagalingkod kita sa Langitnong mga dapit diha kang Cristo, karon atong habwaon ang tanan, ang tanan gikan sa inyong kasingkasing. Ug hinumdumi n'yo, mao kana ang ginaingon sa Pulong sa Dios. Ako mao ang Iyang alagad. Ania Siya. Busa maglamanohay kita sa usa'g usa, ug moingon, "Panalanginan ka sa Dios, igsoon." Kung aduna ka'y kaaway, nan tumindog ka ug duola siya, kita n'yo, "Panalanginan ka sa Dios, igsoon," samtang ginaawit nato pag-usab ang koro ug nagalamanohay ta sa usa'g usa. Karon mahimo ba ninyong buhaton kini, nga may pagkamalumo sa Espiritu.

I love Him, (Panalanginan ka sa Dios, Igsoong
Roy). . . love Him
Because . . . first loved me

And purchased my salvation
 ...?...Samtang ginapataas nato ang atong mga kamot
 karon.

I love Him, I love Him
 Because... (Hinumdumi n'yo si Jesus!)
 And purchased my salvation
 On Calvary's tree.

¹⁰⁴ Karon iduko nato ang atong mga ulo ug laylayon kini.
 Samtang ginahinumduman si Jesus!

... first loved me.

[Nagalaylay si Igsoong Branham.]

¹⁰⁵ Karon samtang nagatugtog ang atong igsoon, sa malumo
 ug hinay nga paagi, hangyoon ko ang buotan natong igsoon...
 Igsoong Neville, aduna ka pa ba'y gustong isulti, o unsa man?
 Sige. Hangyoon ko si Igsoong Collins dinha sa luyo, ang atong
 maunongong, ubos nga igsoon dinhi, nga usa sa mga kaabag,
 kung mahimo ipapauli na niya kita diha sa pag-ampo. Samtang
 ginaduko nato ang atong mga ulo, Igsoong Collins. 🐦

62-1209 Paghinumdum Sa Ginoo
Branham Tabernacle
Jeffersonville, Indiana U.S.A.

CEBUANO

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org